



جابتن حال إحوال اكلام إسلام قولوا فينخ
JABATAN HAL EHWAL AGAMA ISLAM PULAU PINANG



TEKS KHUTBAH

**KEJUJURAN DALAM KEBAJIKAN:
HINDARI PENIPUAN**



Tarikh Bacaan:
25 APRIL 2025M / 26 SYAWAL 1446H

Dibiayai :



MAJLIS AGAMA ISLAM
NEGERI PULAU PINANG

Diterbitkan :



JABATAN HAL EHWAL AGAMA ISLAM
PULAU PINANG

***Jawatankuasa
Panel Semakan Teks Khutbah
Negeri Pulau Pinang***

- 1. Sahibus Samahah Prof. Madya Dato' Dr. Mohd Sukki bin Othman (Pengerusi)**
Mufti Kerajaan Negeri Pulau Pinang
- 2. YBhg. Ustaz Muhammad Fadzil bin Alias**
Pengarah, Yayasan Dakwah Islamiyah (YADIM) Pulau Pinang
- 3. YBhg. Ustaz Ahmad bin Hashim**
Penasihat, Pusat Pengajian Tahfiz Al-Quran (PPTQ)
Kolej Islam Teknologi Antarabangsa Pulau Pinang (KITAB)
- 4. YBhg. Ustaz Subki bin Mohamed**
Mantan Pensyarah Kanan, IPG Kampus Tuanku Bainun
- 5. YBrs. Dr. Mohamad Zaki bin Hj Abdul Halim**
Penolong Mufti, Bahagian Fatwa,
Jabatan Mufti Negeri Negeri Pulau Pinang
- 6. YBhg. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 7. YBhg. Ustaz Ahmad Shahimi bin Senawi**
Pendakwah
- 8. Ustaz Mohd Hanif bin Omar @ Wahab (Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)



Kejujuran Dalam Kebajikan: Hindari Penipuan

25 April 2025M/ 26 Syawal 1446H

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ، وَنَعُوذُ بِاللَّهِ مِنْ شُرُورِ أَنْفُسِنَا وَمِنْ سَيِّئَاتِ أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ، وَمَنْ يَضِلَّ فَلَا هَادِيَ لَهُ. وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.

اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ أَجْمَعِينَ.

أَمَّا بَعْدُ، فَيَا عِبَادَ اللَّهِ، أُوصِيكُمْ وَإِيَّايَ بِتَقْوَى اللَّهِ، فَقَدْ فَازَ الْمُتَّقُونَ.

قال الله تعالى : يَا أَيُّهَا الَّذِينَ ءَامَنُوا لَا تَأْكُلُوا أَمْوَالَكُمْ بَيْنَكُمْ بِالْبَاطِلِ ... ﴿٢٩﴾ سورة النساء

SIDANG JUMAAT YANG DIKASIHI ALLAH,

Bertakwalah kalian kepada Allah dengan sebenar-benar ketakwaan. Semoga kita bakal mendapat balasan syurga Allah *سُبْحَانَهُ وَتَعَالَى* yang dijanjikan kepada orang yang menyerahkan dirinya kepada Allah.

Mimbar menyeru jemaah untuk memberi fokus sepenuhnya kepada khutbah yang disampaikan. Menurut Irsyad Fatwa Negeri Pulau Pinang, sunat hukumnya bagi orang yang mendengar khutbah untuk diam daripada berkata-kata dan tidak melakukan sebarang aktiviti selain mendengar khutbah.



Pada hari ini, mimbar juga ingin mengajak sidang Jumaat sekalian untuk merenung satu isu yang kian meresahkan masyarakat, iaitu fenomena penipuan oleh pengutip derma yang tidak jujur. Isu ini semakin berleluasa, terutama di kawasan bandar seperti Pulau Pinang, di mana sifat pemurah umat Islam sering menjadi sasaran mereka yang tidak bertanggungjawab. Justeru pada hari ini, mimbar akan membicarakan tajuk yang amat relevan dengan jemaah sekalian, iaitu **“Kejujuran Dalam Kebajikan: Hindari Penipuan”**.

SIDANG JUMAAT YANG DIMULIAKAN ALLAH *سُبْحَانَهُ وَتَعَالَى*,

Amalan bersedekah adalah ibadah yang sangat mulia. Namun, apabila ia disalahgunakan oleh individu yang tamak, keindahan nilai kebajikan itu tercemar. Kita perlu sedar bahawa memberi derma tanpa berhati-hati juga boleh membuka ruang kepada dosa apabila ia menyumbang kepada perbuatan haram atau penipuan.

Kita sering mendengar kisah-kisah penipuan yang dilakukan oleh pengutip derma yang berlaku tanpa bermusim. Antaranya:

1. **Penyamaran wakil organisasi kebajikan** – Ada individu yang mengaku sebagai wakil rumah anak yatim atau masjid tetapi tidak mempunyai dokumen yang sah.
2. **Resit dan dokumen palsu** – Pengutip derma memperdaya masyarakat dengan resit palsu kononnya hasil sumbangan akan disalurkan ke rumah kebajikan.
3. **Penggunaan kanak-kanak dan warga emas** – Modus operandi seperti ini sering digunakan untuk meraih simpati, sedangkan hasil

kutipan tidak sampai kepada pihak yang memerlukan.

4. **Sindiket pengemis profesional** – Ada yang menjalankan pengutipan secara terancang, bahkan mengupah individu tertentu untuk berlakon sebagai golongan yang memerlukan.
5. **Pengutipan tanpa kebenaran rasmi** – Pengutip derma sepatutnya mendapatkan kelulusan daripada pihak berkuasa seperti Jabatan Hal Ehwal Agama Islam Pulau Pinang.

Kesemua ini adalah contoh nyata bagaimana sifat pemurah umat Islam dieksploitasi. Perbuatan ini bukan sahaja merugikan masyarakat, malah mencemarkan nama baik agama Islam yang menganjurkan keikhlasan dan ketulusan.

Allah سُبْحَانَهُ وَتَعَالَى berfirman dalam surah al-Baqarah, ayat 188:

وَلَا تَأْكُلُوا أَمْوَالَكُمْ بَيْنَكُمْ بِالْبَاطِلِ وَتُدْلُوا بِهَا إِلَى الْحُكَّامِ لِتَأْكُلُوا فَرِيقًا مِّنْ
أَمْوَالِ النَّاسِ بِالْإِثْمِ وَأَنْتُمْ تَعْلَمُونَ ﴿١٨٨﴾

Maksudnya: “Dan janganlah kamu memakan (atau mengambil) harta (orang lain) antara kamu dengan jalan yang batil dan janganlah kamu menghulurkan harta kamu (memberi rasuah) kepada para hakim dengan maksud supaya kamu dapat memakan (atau mengambil) sebahagian daripada harta benda orang lain dengan (jalan berbuat) dosa padahal kamu mengetahui (salahnya)”

Ayat ini adalah peringatan yang jelas bahawa Allah سُبْحَانَهُ وَتَعَالَى melarang keras kita mengambil atau menggunakan harta orang lain

dengan cara yang batil. Penipuan, pemalsuan, dan eksploitasi adalah antara contoh perbuatan batil yang menjadi dosa besar di sisi Allah ﷻ. Rasulullah ﷺ juga bersabda:

مَنْ غَشَّ فَلَيْسَ مِنِّي

Maksudnya: *“Siapa yang menipu, maka ia bukan dari golonganku.”*

﴿Hadis Riwayat Muslim﴾

SIDANG JUMAAT YANG DIRAHMATI ALLAH,

Sabda Rasulullah ini sangat tegas dan menyentuh hati. Ungkapan “bukan dari golonganku” membawa makna amat berat. Ia memberi isyarat bahawa sesiapa yang menipu, meskipun mengaku sebagai umat Rasulullah, telah melepaskan diri daripada ikatan spiritual dan moral sebagai pengikut Baginda. Menipu adalah perbuatan yang bertentangan dengan akhlak Islam yang luhur, yang mengangkat nilai kejujuran sebagai asas kepada keimanan.

Bayangkanlah sidang Jumaat sekalian, bagaimana Rasulullah yang dikenali dengan gelaran al-Amin (الأمين) (yang dipercayai), mempraktikkan nilai kejujuran sepanjang hayatnya. Ketika Baginda menyampaikan risalah Islam, Baginda berdiri atas landasan integriti dan amanah. Namun, apabila seseorang memilih untuk menipu, mereka sebenarnya telah mengkhianati ajaran Baginda. Rasulullah ﷻ, sebagai rahmat bagi seluruh alam, tidak akan mengakui mereka sebagai umatnya.

SIDANG JUMAAT YANG DIRAHMATI,

Penipuan bukan sekadar dosa tetapi juga ancaman kepada masyarakat. Perbuatan ini boleh merosakkan kepercayaan sosial yang menjadi asas hubungan manusia. Apabila kejujuran diabaikan, umat Islam akan hilang kekuatan untuk saling mempercayai dan bekerjasama. Ini adalah kerosakkan yang meluas dan mendalam.

Lebih menyedihkan, apabila penipuan dilakukan atas nama agama dan kebajikan, seperti yang dilakukan oleh pengutip derma yang tidak jujur, kesannya menjadi lebih buruk. Malah ada yang menjadikan kutipan derma sebagai alat untuk meneruskan kemewahan hidup.

Perbuatan ini bukan saaja menipu manusia tetapi juga mencemarkan nama Islam di mata dunia. Orang bukan Islam yang melihat penipuan ini akan mempersoalkan keindahan ajaran Islam. Bahkan umat Islam sendiri akan berasa tawar hati untuk bersedekah apabila mereka curiga terhadap pengutip derma.

Apabila seseorang menipu, mereka sebenarnya sedang merosakkan jiwa mereka sendiri. Penipuan memupuk rasa bersalah dan menghakis ketenangan hati. Selain itu, mereka yang menipu bukan sahaja memperdaya penderma, tetapi menganiayai golongan memerlukan yang sepatutnya menerima bantuan.

Ingatlah, Allah **سُبْحَانَهُ وَتَعَالَى** telah mengeaskan melalui firman-Nya bahawa setiap perbuatan, baik yang nyata atau tersembunyi, akan dipersoalkan:

فَمَنْ يَعْمَلْ مِثْقَالَ ذَرَّةٍ خَيْرًا يَرَهُ ﴿٧﴾ وَمَنْ يَعْمَلْ مِثْقَالَ ذَرَّةٍ شَرًّا يَرَهُ ﴿٨﴾

Maksudnya: “Maka sesiapa melakukan kebaikan seberat zarah nescaya akan dilihatnya (dalam suratan amalannya). Dan sesiapa melakukan kejahatan seberat zarah nescaya akan dilihatnya (dalam suratan amalannya).” ﴿Surah al-Zalzalah, ayat 7-8﴾

SAUDARA-SAUDARAKU YANG DIKASIHI,

Rentetan daripada kezaliman Zionis Yahudi yang tidak berperikemanusiaan terhadap umat Islam di Palestin yang membunuh kanak-kanak, wanita dan orang awam dengan sewenang-wenangnya, maka khatib juga mengambil kesempatan dalam khutbah hari ini untuk menggesa agar dunia Islam bersatu untuk berjihad mempertahankan bumi Palestin daripada terus dinodai.

Umat Islam dan negara Islam wajib berjihad membela rakyat dan negara Palestin dengan kaedah jihad yang ditetapkan oleh syarak.

Negara-negara umat Islam perlu mengambil satu tindakan yang tegas dengan menghantar bantuan berbentuk ketenteraan dan persenjataan demi menyelamatkan umat Islam di Palestin.

Umat Islam juga dinasihatkan untuk tidak bertindak secara semborono dalam menyahut seruan jihad bersenjata. Hal ini kerana usaha jihad diuruskan oleh ulil amri (pemerintah) dan ia bukan bersifat individu.

Oleh yang demikian, tidak sewajarnya individu bertindak mengangkat senjata secara peribadi ke bumi Palestin kerana ia lebih memberi mudarat dan menggugat keamanan.

SIDANG MUSLIMIN RAHIMAKUMULLAH,

Mengakhiri khutbah pada hari ini dapat disimpulkan beberapa perkara yang perlu diberi perhatian;

Pertama: Islam menekankan pentingnya kejujuran dalam setiap aspek kehidupan. Penipuan, terutamanya yang dilakukan atas nama kebajikan atau agama, merupakan dosa besar yang boleh menyebabkan pelakunya tidak tergolong dalam kalangan umat Nabi Muhammad ﷺ.

Kedua: Umat Islam digalakkan untuk sentiasa berhati-hati dan menyelidik terlebih dahulu sebelum memberikan sumbangan. Pastikan pengutip derma mempunyai dokumen rasmi atau berdaftar dengan pihak berkuasa.

Ketiga: Penipuan boleh merosakkan kepercayaan dalam masyarakat, menjadikan orang ramai ragu-ragu untuk bersedekah atau membantu golongan memerlukan, sekaligus mencemarkan nilai persaudaraan Islam.

Keempat: Penipuan yang dilakukan atas nama agama atau kebajikan mencemarkan imej Islam di mata dunia. Boleh mengundang fitnah terhadap agama yang suci ini serta menjejaskan usaha dakwah.

Kelima: Umat Islam bertanggungjawab untuk melaporkan sebarang aktiviti mencurigakan kepada pihak berkuasa. Ini adalah sebahagian

daripada usaha amar makruf nahi mungkar (أَمْرٌ مَعْرُوفٌ نَهْيٌ مُنْكَرٌ) untuk membanteras kemungkaran dalam masyarakat.

Marilah kita berazam untuk menjauhi penipuan dalam apa jua bentuk, lebih-lebih lagi apabila ia melibatkan hak orang lain. Ingatlah, setiap helah dan penipuan yang dilakukan di dunia ini tidak akan terlepas daripada timbangan keadilan Allah di akhirat kelak. Semoga kita semua tergolong dalam kalangan umat yang dicintai Rasulullah صَلَّى اللهُ عَلَيْهِ وَسَلَّمَ, dan bukan mereka yang disisihkan kerana dosa penipuan.

أَعُوذُ بِاللَّهِ مِنَ الشَّيْطَانِ الرَّجِيمِ

بِسْمِ اللَّهِ الرَّحْمَنِ الرَّحِيمِ

وَالْعَصْرِ ۝١ إِنَّ الْإِنْسَانَ لَفِي خُسْرٍ ۝٢ إِلَّا الَّذِينَ ءَامَنُوا وَعَمِلُوا الصَّالِحَاتِ وَتَوَاصَوْا

بِالْحَقِّ وَتَوَاصَوْا بِالصَّبْرِ ۝٣

Maksudnya: “Demi masa, sesungguhnya manusia berada dalam kerugian, kecuali orang-orang yang beriman dan beramal soleh, saling berpesan tentang kebenaran dan kesabaran.”

﴿Surah al-Asr, ayat 1-3﴾

بَارَكَ اللهُ لِي وَلَكُمْ بِالْقُرْآنِ الْعَظِيمِ، وَنَفَعَنِي وَآيَاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ، وَتَقَبَّلَ اللهُ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا، وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ، الْأَحْيَاءِ مِنْهُمْ وَالْأَمْوَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.



Khutbah Kedua

2025M/1446H

الْحَمْدُ لِلَّهِ رَبِّ الْعَالَمِينَ، وَالصَّلَاةُ وَالسَّلَامُ عَلَى سَيِّدِنَا مُحَمَّدٍ النَّبِيِّ الْأَمِينِ،
وَعَلَى آلِهِ وَأَصْحَابِهِ وَالتَّابِعِينَ، وَمَنْ تَبِعَهُمْ بِإِحْسَانٍ إِلَى يَوْمِ الدِّينِ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، لَهُ الْمُلْكُ وَلَهُ الْحَمْدُ يُحْيِي وَيُمِيتُ
وَهُوَ عَلَى كُلِّ شَيْءٍ قَدِيرٌ، وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى سِرَاجِ مُنِيرٍ.

صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ.

MUSLIMIN YANG DIRAHMATI ALLAH,

Perbuatan sebilangan peminjam yang sengaja mengabaikan tanggungjawab melangsaikan pembayaran balik pinjaman pendidikan seperti Tabung Amanah Pinjaman Penuntut Negeri Pulau Pinang, Perbadanan Tabung Pendidikan Tinggi Nasional (PTPTN), Majlis Amanah Rakyat (MARA) dan sebagainya tanpa sebab munasabah adalah menzalimi hak orang lain. Tindakan sedemikian jelas haram dalam Islam, terutamanya jika seseorang peminjam itu ada kemampuan tetapi sengaja berlengah-lengah melunaskan hutang terbabit.

Sebagai peminjam, kita haruslah menunaikan kewajiban dengan membayar balik pinjaman pendidikan tersebut untuk manfaat generasi akan datang. Tampil berundinglah dengan agensi berkaitan untuk mencari kaedah bayaran balik yang bersesuaian.

قَالَ اللَّهُ تَعَالَى: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا.

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ اعِزَّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَأَنْصُرْ مَنْ نَصَرَ
الدِّينَ، وَاخْذُلْ مَنْ خَذَلَ الْمُسْلِمِينَ، وَأَعْلِلْ كَلِمَتَكَ إِلَى يَوْمِ الدِّينِ.

اللَّهُمَّ أَنْصُرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلَسْطِينَ وَفِي كُلِّ
مَكَانٍ، وَفِي كُلِّ زَمَانٍ، بِرَحْمَتِكَ يَا أَرْحَمَ الرَّاحِمِينَ.

اللَّهُمَّ أَصْلِحْ أَيْمَتَنَا وَوُلَاةَ أُمُورِنَا، وَاجْعَلْ وِلَايَتَنَا فِيْمَنْ خَافَكَ وَاتَّقَاكَ يَا رَبَّ
الْعَالَمِينَ. اللَّهُمَّ اجْعَلْ بَلَدَنَا مَالِيْرِيَا خُصُوصًا وَوِلَايَةً قُولاو فِينِغَ آمِنًا مُطْمَئِنًا
سَخَاءَ رَخَاءٍ، دَارَ عَدْلِ وَإِيْمَانٍ، وَأَمْنٍ وَأَمَانٍ، يَا ذَا الْفَضْلِ وَالْإِحْسَانِ.

اللَّهُمَّ وَفَّقْ قَادَتَنَا وَرُوعْمَاءَنَا وَوُلَاةَ أُمُورِنَا لِمَا فِيهِ عِزُّ دِينِكَ وَنَصْرُ شَرِيْعَتِكَ، اللَّهُمَّ
اجْعَلْهُمْ هُدَاةً مُهْتَدِينَ صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيْقِكَ عَلَى
صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Sultan Ibrahim dan Kebawah Duli Yang Maha Mulia Seri Paduka Baginda Raja Permaisuri Agong, Raja Zarith Sofiah.

وَكذَلِكَ صَاحِبِ الْفَخَامَةِ،

Tun Ahmad Fuzi Bin Haji Abdul Razak, Yang di-Pertua Negeri Pulau Pinang dan Toh Puan Khadijah Binti Mohd Noor.

Ya Allah! Dengan sifat-Mu yang Maha Pemurah dan Maha Penyayang; Jadikanlah kami dan keturunan kami orang yang istiqamah mendirikan solat secara berjemaah, mengeluarkan zakat melalui Zakat MAINPP dan melaksanakan waqaf melalui Wakaf MAINPP. Rahmatilah jua para pembayar zakat dan pewakaf sekalian, serta berkatilah usaha Kerajaan Negeri melalui Majlis Agama Islam Negeri Pulau Pinang dalam usaha mewujudkan keseimbangan sosio-ekonomi ummah di negeri yang tercinta ini.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَائِي ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ. فَادْكُرُوا اللَّهَ الْعَظِيمَ يَذْكُرْكُمْ، وَاشْكُرُوهُ عَلَىٰ نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ.



جابتن حال إحوال اكلام إسلام قولواو فینخ
JABATAN HAL EHWAL AGAMA ISLAM PULAU PINANG